

# CULLETTIVITÀ DI CORSICA

ASSEMBLEA DI CORSICA

2<sup>DA</sup> SESSIONE URDINARIA DI U 2018  
REUNIONE DI I 25 E 26 D'UTTOBRE DI U 2018

N<sup>U</sup> 2018/O2/081

## MUZIONE CÙ DUMANDA D'ESAME PRIURITARIU

**POSTA DA :** U GRUPPU « CORSICA LIBERA »

**UGETTU :** INTEGRAZIONE DI A SPEZIALITÀ « LINGUA E CULTURA  
CORSA » IN OGNI LICEU DI CORSICA IN PIÙ DI E SETTE  
SPEZIALITÀ À SCEGLIE DA I LICEI.

---

**VISTU** u decretu n<sup>U</sup> 2018-614 di u 16 di lugliu di u 2018 mudifichendu e dispusizione di u codice di l'educazione chì toccanu à l'insignamenti chì portanu à u basciigliè generale è à e furnazione tecnulogiche chì portanu à u basciigliè tecnulogicu,

**VISTU** l'arrestatu N<sup>U</sup> 0162 di u 16 di lugliu di u 2018 chì tocca à l'urrganizazione è à i vulumi urarii di l'insignamenti di u ciculu terminale di i licei, sanziunati da u basciigliè generale,

**CUNSIDERENDU** chì i liceani chì sò in seconda quist'annu seranu i primi à passà a versione nova di u basciigliè in u 2021,

**CUNSIDERENDU** chì sta riforma face sparisce e filiere Literarie (L), Scintifiche (S) è Economiche è Suciale (ES),

**CUNSIDERENDU** chì nanzu à a riforma, i liceani di a filiera literaria pudianu sceglie un insegnamentu di spezialità di lingua corsa è cultura corsa cù un forte cuefficiente d'ottu,

**CUNSIDERENDU** chì ogni liceu generale deve prupone à sceglie à i liceani di prima di l'annu chì vene frà 7 spezialità nantu à e dodeci di previste da a riforma,

**CUNSIDERENDU** chì i licei sò in traccia d'adunisce i so cunsigli pedagogichi per sceglie e specialità per l'annu chì vene nanzu di falle vutà à i cunsigli d'amministrazione à vene,

**CUNSIDERENDU** chì l'insignamentu di a lingua è di a cultura corsa ùn face micca parte di a lista di l'insignamenti di specialità,

**CUNSIDERENDU** chì i puteri publichi sò ublicati di prupone un insegnamentu di lingua è di cultura corsa fin'à a sesta oramai è ch'ellu deveria dunque esse prupostu dinù in specialità à i liceani chì a volenu,

**CUNSIDERENDU** u gran'pianu di furmazione di l'insignanti di u primu gradu finanziatu per mità da a CDC è u Statu,

**CUNSIDERENDU** i bisogni impurtanti à vene di professori di e scole bislingui,

**CUNSIDERENDU** chì un insegnamentu di specialità lingua è cultura corsa seria una bona per appruntà i futuri candidati à i cuncorsi di l'insignamentu (professori di e scole bislingui, professori certificati o agregati abilitati...),

**CUNSIDERENDU** chì e risolze umane (professori certificati o agregati di lingua è cultura corsa) sò digià in postu è ch'elle davanu digià insignamenti di specialità,

**CUNSIDERENDU** tandu ch'ella ùn cambieria nunda à livellu di l'urrganizazione di i licei generali di Corsica è ch'ella ùn custeria nunda di più à e finanze publiche,

**CUNSIDERENDU** chì a dumanda d'amparera di a lingua è di a cultura corsa hè di più in più impurtante fora di a scola è dunque chì a sucetà corsa abbisogna di più in più furmatori cursofoni qualificati,

**CUNSIDERENDU** chì per l'Assemblea di Corsica, a lingua è a cultura corsa si devenu d'esse insignate à ogni livellu sculare,

**CUNSIDERENDU** i mezi finanziari è umani messi in opera ogni annu da l'Assemblea di Corsica per chì a lingua corsa si rinvivissi ch'ella fussi à a scola o in a sucetà,

**CUNSIDERENDU** chì mette a specialità lingua è cultura corsa per u bascigliè corrisponde à a vulintà magiuritaria di l'Assemblea di Corsica d'andà versu un bislinguisimu veru in ogni locu,

## **L'ASSEMBLEA DI CORSICA**

**DUMANDA** chì a lingua corsa fussi pruposta cum'è insegnamentu di specialità in ogni liceu generale di l'isula in u dispositivu novu di a riforma.

**DUMANDA** à u Ministru di l'Educatione è à u Ministru di l'Agricoltura è di l'Alimentazione di mudificà in cunsequenza l'arrestatu N<sup>u</sup> 0162 di u 16 di lugliu di u 2018 per integrà sta dispusizione.